

REGIONAL NEWS

UNIT

ALL INDIA RADIO, AGARTALA

Date:08-10-2024

Time: 07.35-07.40 AM Hrs

BENGALI MORNING BULLETIN

Durga Puja-C.M :

শারদীয়া দুর্গোৎসবের আজ পঞ্চমী। আগামীকাল মহাষষ্ঠীতে হবে মায়ের বোধন। তবে গতকালই অনেক পূজো মন্ডপের উদ্বোধন হয়ে গেছে। মানুষজনও গতকালই পূজো দেখতে বেরিয়ে পড়েছেন। এবছর সারা রাজ্যে আড়াই হাজারেরও বেশি দুর্গাপূজা হচ্ছে। দুর্গাপূজা শান্তিপূর্ণভাবে সম্পন্ন করতে এবছর প্রায় ছয় হাজার টি.এস.আর মোতায়েন করা হচ্ছে।

CM-Puja :

মুখ্যমন্ত্রী প্রফেসর ডাঃ মানিক সাহা বলেছেন, সুষ্ঠুভাবে ও নির্বিঘ্নে শারদোৎসব উদযাপন করার ক্ষেত্রে ত্রিপুরার বহুদিনের পরম্পরা রয়েছে। গতকাল আগরতলার প্রতাপগড়স্থিত গ্রীন অ্যারো ক্লাবের দুর্গা প্রতিমার উদ্বোধন করে তিনি একথা বলেন। মুখ্যমন্ত্রী সাংবাদিকদের বলেন, পূজোকে ঘিরে সবার মধ্যে আনন্দের ভাব পরিলক্ষিত হচ্ছে। কিন্তু মাঝেমধ্যে আনন্দের পরিবেশ নষ্ট করার চেষ্টা হয়। এবিষয়ে তিনি সবাইকে সতর্ক থাকতে বলেন। তিনি জানান, উত্তর জেলার কদমতলায় অনাকাঙ্ক্ষিত ঘটনা নিয়ে প্রশাসনের পক্ষ থেকে যথাযথ ব্যবস্থা নেওয়া হয়েছে এবং গোটা পরিস্থিতি নিয়ন্ত্রণে রয়েছে।

গতকালের অনুষ্ঠানে রাজ্যসভার সাংসদ রাজীব ভট্টাচার্য, আগরতলা পুর নিগমের মেয়র দীপক মজুমদার সহ অন্যান্যরা উপস্থিত ছিলেন।

CM-Dashamighat :

মুখ্যমন্ত্রী প্রফেসর ডা: মানিক সাহা বলেছেন, আগরতলা শহরকে সাজিয়ে তোলার জন্য সরকার বিভিন্ন প্রকল্প রূপায়ণ করেছে। গতকাল হাওড়া রিভার ফ্রন্ট ডেভেলপমেন্ট প্রকল্পে আধুনিক ব্যবস্থাপনায় নবনির্মিত আগরতলা দশমীঘাট ও সংশ্লিষ্ট অন্যান্য পরিকাঠামোর উদ্বোধন করে তিনি একথা বলেন। অনুষ্ঠানে মুখ্যমন্ত্রী বলেন, দশমীঘাটে প্রতিমা নিরঞ্জন ব্যবস্থা বর্তমানে অনেক উন্নত হয়েছে। তিনি বলেন, হাওড়া নদীর জল আগরতলা শহরের বেশীরভাগ অংশেই পানীয় জলের উৎস হিসেবে ব্যবহৃত হচ্ছে। এছাড়াও আগরতলা শহরের নাগরিকদের ধর্মীয় আচার-আচরণের প্রাণকেন্দ্র এই হাওড়া নদী। সরকার হাওড়া নদীর উন্নয়ন ও সংস্কারে বিভিন্ন পরিকল্পনা নিয়ে কাজ করছে। মুখ্যমন্ত্রী বলেন, হাওড়া রিভার ফ্রন্ট ডেভেলপমেন্ট প্রকল্পের মাধ্যমে বন্যা প্রতিরোধ, নদীর পাড়ের ক্ষয়রোধ এবং হাওড়া নদীর বাঁধটিকে শক্তিশালী করা হচ্ছে। এই প্রকল্পে হাওড়া নদীর জলকে দূষণমুক্ত করতে সিতুনালা ট্রিটমেন্ট প্ল্যান্টের নির্মাণ ও অন্যান্য কাজ সহ নদী এলাকার জনগণের জীবিকা সৃষ্টিতে নদীর পাড়ে জৈব চাষের মাধ্যমে সব্জি ও ফুলচাষের ব্যবস্থা করা হচ্ছে। এই প্রকল্পটির মাধ্যমে হাওড়া নদীর দশমীঘাটটি একটি নান্দনিক পর্যটন স্থান হিসেবেও গড়ে উঠবে বলে উল্লেখ করেন তিনি। অনুষ্ঠানে আগরতলা পুরনিগমের মেয়র তথা বিধায়ক দীপক মজুমদার বলেন, নাগরিকরা যাতে প্রতিমা নিরঞ্জন পর্ব স্বাচ্ছন্দে উপভোগ করতে পারেন সেজন্যই দশমীঘাটকে আধুনিকভাবে সাজিয়ে তোলা হয়েছে। দশমীঘাটের রক্ষণাবেক্ষণে সরকারের পাশাপাশি স্থানীয় এলাকার মানুষকে এগিয়ে আসার আহ্বান জানান তিনি।

National Film Award :

রাষ্ট্রপতি দ্রৌপদী মুর্মু আজ নতুনদিল্লিতে ৭০তম জাতীয় চলচ্চিত্র পুরস্কার প্রদান করবেন। অনুষ্ঠানে কিংবদন্তি অভিনেতা মিঠুন

চক্রবর্তীকে সিনেমার ক্ষেত্রে সর্বোচ্চ স্বীকৃতি দাদাসাহেব ফালকে পুরস্কারে ভূষিত করা হবে। কন্নড় ছবি কান্তারা-তে অসাধারণ অভিনয়ের জন্য ঋষভ শেঠিকে সেরা অভিনেতার পুরস্কার দেওয়া হবে। সেরা অভিনেত্রীর পুরস্কার পাবেন নিথ্যা মেনেন তামিল ছবি তিরুচিত্রম্বলামের জন্য এবং মানসী পারেখ গুজরাটি ছবি কচ্ছ এক্সপ্রেসের জন্য।

সিনেমার সেরা কাহিনী "কিশোর কুমার দ্য আল্টিমেট বায়োগ্রাফি"র জন্য পুরস্কার পাচ্ছেন লেখক অনিরুদ্ধ ভট্টাচার্য এবং পার্থিব ধর। সেরা ফিচার ফিল্ম পুরস্কার দেওয়া হবে মালায়ালাম ছবি আট্টামকে, আর আয়েনাকে সেরা নন-ফিচার ফিল্ম হিসেবে স্বীকৃতি দেওয়া হবে। সুরজ বরজাতিয়া তার চলচ্চিত্র উঁচাইয়ের জন্য সেরা পরিচালক হিসাবে সম্মানিত হবেন। ফিচার ফিল্ম বিভাগে, গুলমোহর সেরা হিন্দি চলচ্চিত্রের পুরস্কার পাবে।

সঙ্গীত বিভাগে, অরিজিৎ সিংকে সেরা পুরুষ প্লেব্যাক গায়কের এবং বোম্বে জয়শ্রী সেরা মহিলা প্লেব্যাক গায়িকার পুরস্কার পাবেন। এছাড়াও রাষ্ট্রপতি আরও বেশকিছু পুরস্কার দেবেন।

Jammu & Kashmir :

জম্মু ও কাশ্মীরের এবং হরিয়ানা বিধানসভা নির্বাচনের ভোট গণনা করা হবে আজ। ভোট গণনা শান্তিপূর্ণভাবে সম্পন্ন করার জন্য প্রতিটি জেলা সদরে ব্যাপক নিরাপত্তা ব্যবস্থা গ্রহণ করা হয়েছে। উল্লেখ্য, কেন্দ্রশাসিত অঞ্চল জম্মু ও কাশ্মীর এবং হরিয়ানাকে ৯০টি করে বিধানসভার আসন রয়েছে।

Samabhumi Libary :

সমবায় মন্ত্রী শুক্লাচরন নোয়াতিয়া গতকাল জোলাইবাড়ি ব্লকের বাইখোড়ার পশ্চিম চরকবাইয়ে সমভূমি সামাজিক সংস্থার

উদ্যোগে গড়ে উঠা সমভূমি গ্রন্থাগার, পাঠাগার ও লিটল ম্যাগাজিন সংগ্রহশালার নবনির্মিত ভবনের দ্বারোদঘাটন করেন। উপস্থিত ছিলেন বিশিষ্ট কবি জ্যোতির্ময় রায়, মুহুরী নাট্য সংস্থার সভাপতি প্রাণজীব সরকার, প্রবীণ নাট্য শিল্পী বিমলবিহারী বৈদ্য, সমভূমি সামাজিক সংস্থার সভাপতি সত্যজিৎ বৈদ্য ও সম্পাদক অতীক কুমার দে প্রমুখ।

Dipa's Retirement :

রাজ্যের পদ্মশ্রী অলিম্পিয়ান জিমনাস্ট দীপা কর্মকার অবসরের ঘোষণা দিলেন। সামাজিক মাধ্যমে এই সিদ্ধান্ত জানিয়ে দীপা বলেন, প্রতিযোগিতা মূলক আসর থেকে অবসর নিলেও জিমন্যাস্টিকের প্রসারে তিনি কাজ করে যাবেন। উল্লেখ্য, ২০১৬ সালে রিও অলিম্পিকে দীপা দেশের প্রথম জিমন্যাস্ট হিসেবে অংশ নিয়ে ভলিটং টেবিলে ফাইনাল উঠে চতুর্থ হন। এছাড়া এশিয়ান চ্যাম্পিয়নশীপে স্বর্ণ পদক জয় করেন। পদ্মশ্রী দীপা দেশের খেলাধুলার সর্বোচ্চ খেল রত্ন সম্মান সহ অর্জুন সম্মানেও ভূষিত হয়েছিলেন।

Medal in Judo :

গুজরাটে আয়োজিত জাতীয় স্কুল জুডো প্রতিযোগিতায় ব্রোঞ্জ পদক পেয়েছে রাজ্যের শিয়ামি চাকমা। পাঞ্চগাটের সর্দার প্যাটেল স্পোর্টস কমপ্লেক্সে আয়োজিত অনূর্ধ্ব ১৪ বছরের মেয়েদের ৩৬ কেজি ওজন বিভাগে শিয়ামি একমাত্র ব্রোঞ্জটি পায়।

Weather :

আকাশ সাধারণত মেঘলা থাকবে। কিছু কিছু জায়গায় হালকা থেকে মাঝারি অথবা বজ্র-বিদ্যুৎ সহ দু এক পশলা বৃষ্টিপাতের

সম্ভাবনা রয়েছে। আগামী ২৪ ঘন্টায় সর্বোচ্চ তাপমাত্রা ৩২ ডিগ্রী সেলসিয়াস এবং সর্বনিম্ন ২৫ ডিগ্রী সেলসিয়াসের আশেপাশে থাকবে। আজ সকালের সর্বনিম্ন তাপমাত্রা ছিল ২৫.২ ডিগ্রী সেলসিয়াস।
